

國粹叢書第二集

真山民詩

國學保存會印行



上海图书馆藏书



A541 212 0007 1604B

四庫全書提要

真山民集

宋真山民撰山民始末不可考宋末竄跡隱淪以所至好題咏因傳於世或自呼山民因以稱之或云李生喬嘗嘆其不愧乃祖文忠西山攷真德秀號曰西山諡曰文忠以是疑其姓真或云本名桂芳括蒼人宋末嘗登進士要之亡國遺民鴻冥物外自成探薇之志本不求見知於世世亦無從而知之姓名里籍疑皆好事者以意爲之未必遂確今從舊本題曰真山民集姑仍世之所稱而已其集宋藝文志不著錄明焦竑經籍志蒐宋人詩集頗備亦未載其名江湖小集始收之而亦多未備此本出浙江鮑氏知不足齋較他本爲完善然皆近體無古詩元詩體要中錄其陳雲岫愛騎驢七言古

229866

詩一首此本無之或詩本兩卷而佚其古體一卷或宋末江湖諸人皆不留意古體山民亦染其風氣均未可知然就其存者論之黍離麥秀抱痛至深而無一語懟及新朝則非惟其節至高其安命知天識量亦不可及視謝靈運輩既襲康樂之封而猶稱韓亡子房奮秦帝魯連恥者相去不啻萬萬矣詩格出於晚唐長短皆復相似五言如鬢禿難瞞老心寬不貯愁煙碧柳生色燒青草返魂風竹有聲畫石泉無操琴棠醉風扶起柳眠鶯喚醒地皆宜避暑人自要趨炎飛花游蕩子古木老成人新葬塚無數後來人更多七言如欲談世事佛無語不管客愁禽自啼懶看世情寧睡去怕傷時事莫吟休商嶺定無屠狗客雲臺寧有釣魚人囊空儘可償詩債脚倦猶能入醉鄉雕鏤花柳春無迹沐浴山川雨有恩炭爲

驟寒偏索價酒因不飲懶論交之類皆不出晚唐纖佻麤獷
之習至於五言之鳥聲山路靜花影寺門深風蟬聲不定水
鳥影同飛與鷗分渚泊邀月共船眠窗月燈昏見巖泉雨歇
聞水清明白鷺花落失青苔曳杖雲同出開簾山自來寒塘
倒山影空谷答樵歌七言之泉石定非騎馬路功名不上釣
魚船水禽與我共明月蘆菜同誰吟晚風隔浦人家漁火外
滿江秋思笛聲中小窗半夜青燈雨幽樹一庭黃葉秋澗暗
只聞泉滴瀝山青賸見鷺分明幾畝桑麻春社後數家雞犬
夕陽中則頗得晚唐佳處矣一丘一壑足資延賞要亦宋末
之翹楚也

刊

行

真山民先生詩集小引

嘗稱詩不在縉紳而在布衣蓋謂涉畧有淺深臭味之雅俗也此猶就詩而論也真子之稱山民不啻惟是丁宋元之際不屑仕進甘心石隱其節有足多者況詩又真得布衣之風乎高襟遠韻具見是帙自幽尋雅賞之外絕不作江湖酬應語故所著不廣是以少許勝人多許者所謂千羊之皮不如一狐之腋也李生喬嘗稱不愧西山乃祖使非此語幾不知山民爲何人斯雖然昔獻子之友五人裘牧而下莫可蹤覈迄今高之則西山反爲山民累矣其才情當在林君復之上識者鑒之潘是仁識

刊

行

眞山民詩集

宋 眞 山民 著

順德鄧 實校錄

五言律詩

幽居雜興

松桂小菟裘山扉幽更幽蜂王衙早晚燕子社春秋鬢禿難遮一作
老心寬不貯愁年來把鋤手無復揖公侯

新春

餘凍雪初乾初晴日驟暄人心新歲月春意舊乾坤煙碧柳出一作
色燒青草返魂東風無厚薄隨例到衡門

光霽閣晚望

一閣納萬象危闌俯渺茫白沙難認月黃葉易爲霜宿鳥投煙嶼
歸樵趁野航孤吟誰是伴漁笛起滄浪

興福寺

爲厭市喧雜攜詩來此吟鳥聲山路靜花影寺門深樓閣莊嚴界
池塘清淨心松風亦好事送客出前林

夏晚江行

行盡山頭路江空帶夕暉風蟬聲不定水鳥影同飛蕭散烏藤杖
輕髮白苧衣試呼垂釣者分我半苔磯

脩眞院訪崔道士

竹扉蒼蘚牆林下小丹房風定香烟直月斜簾影長淪茶泉味別
點易露痕香安得棲塵外求師却老方

春遊和胡叔芳韻

春光潑眼明占勝得新亭棠醉風扶起柳眠鶯喚醒非無杯泛綠
安得鬢皆青且事日爲樂歌聲莫暫停

山亭避暑

怕礙清風入，丁寔莫下簾。地皆宜避暑，人自要趨炎。竹色水千頃，松聲風四簷。此中有幽致，一作趣多取未傷廉。

三山旅夜

獨坐本無況，淒涼更旅中。楹低簷得月，窗破紙吟風。鄰館笛三弄，譙樓鼓二通。引觴聊自適，新荔擘輕紅。

枕上偶成

長夜更難曉，天寒吟思清。夢魂山館枕，燈影雪窗檠。守拙踈生理，安貧識世情。淒風響簷竹，豈是不平聲。

泊白沙渡

日暮片帆落，渡頭生暝烟。與鷗分渚泊，邀月共船眠。燈影漁舟外，湍聲客枕邊。離懷正無奈，况復聽啼鶯。

夜話無上人房

蒲圍一榻上坐到夜將分窗月燈昏見巖泉
一作雨歇聞茶甌勝
飲酒禪語當論文只恐紅塵跡浣師松下雲

獨坐

寒齊淡無味孤坐思悠悠時事三緘口年光一轉頭有書遮老眼
無藥療閒愁假使丹心在衰遲也合休

春日

韶光今幾許我欲問流鶯花影掃不去草根鉏又生心空諸妄息
身老萬緣輕正是春風好幽蘭不冒爭

曉行山間

出門誰是伴只約瘦藤行一二里山徑兩三聲曉鶯亂峯相出沒
初日乍陰晴僧舍在何許隔林鐘磬清

山間次季芳宿

宿一無韵
宿字

好山多在眼塵事少關心風竹有聲畫石泉無操琴許猿分野果
留鶴守雲林不是閑邊

一作中

客誰來此地吟

春感

春光元自好我却爲春愁但見柳青眼不知人白頭一身浮似寄
百歲去如流賴有芳尊在花前日醉遊

春曉園中

綠陰留我立清曉小闌東林外一鳩雨柳邊雙燕風陰懷愁渺渺
春事去匆匆莫恨芳菲盡葵榴花又紅

溪行

春暖溪西路行吟又幾迴水清明白鷺花落失青苔雲過日吞吐
樹搖風往來漁歌聽未了欲去又徘徊

除夜約張梅境飲

今日又除夕君能爲我來燭光紅照席酒浪綠搖杯臘帶吟愁去
春隨笑臉回相看俱健在莫管歲華催

渡江之越宿蕭山縣

昨夜大江舟今宵小驛樓隻身千里客孤枕一燈秋市酒難成醉
鄉書莫寄愁胸中無史記浪作會稽游

宿寶勝寺

苦吟吟未了只向兩廊行月去塔無影風來鐸有聲禪一作塵心隨
水淨佛眼共燈明安得雲邊住與僧分此清

間居

虛明兩竹窗濟楚一書房風動鳥移樹花香蝶過牆身安知病少
晝靜覺春長未必全無事終焉也勝忙

兵後廐舍

一有送字但詩中無送字意似有脫文春

觸景多懷舊凭闌易愴神
飛花遊蕩子古木老成人
世換山如醉田荒草自新
鄉關渺何處回首暗風塵

樓居

攜書來過此便覺不不字誤一作少塵埃簷冷留雲宿
牕明報月來閒愁山隔斷
幽夢鳥呼回湖海元龍氣
從渠俗子猜

蘭溪舟中

一舸下中流西風兩岸秋
櫓聲搖客夢帆影挂離愁
落日魚鰕市長煙蘆荻洲
篙人夜相語明發又嚴州

兵後劉秀寬見過

冉冉歲云暮間居安所之
途窮身是累痛定語猶悲
衰鬢數莖雪空囊一卷詩
儒衣例如此惜也不逢時

清明

清明今日是原上一經過新葬塚無數未來人更多此生曾悟否
不樂復如何莫待澆墳土尊前且醉歌

臨江晚

良一作曉
行

茅舍亂雞聲疎林淡見星霜輕留艸綠霧暗失山青蹤跡去來燕
交游聚散萍浮生原是客不必恨飄零

寄郊月篷

烟波秋草外活計一漁篷淡月明寒葦新霜醉曉楓身雖殊出處
道豈有窮通俯仰看人面何如數過鴻

舟中峽口

亂山如碧玉處處見鵝花水漲傍分港舟行倒走沙宿依沽酒市
飯過釣魚家喜脫風波險推篷數暝雅

次韵章劍溪山居

想無書赴隴林雀莫驚猜
曳杖雲同出開簾山自來
池堪供洗硯籬不碍觀梅
靜倚長松立藤花點翠苔

夏日

虛窗暑亦涼境靜晝偏長
樹色煙明滅蟬聲風抑揚
家貧書是業身老睡爲鄉
赤日黃埃客紛紛爲底忙

歲除寄王中齋

徂歲已匆匆何人似此翁
事雖隨世異道不與冬窮
身老心猶壯鬢斑臉自紅
椒花一盃酒明日又春風

宋道士同遊白雲關

扶攜方外友來入白雲
關八九峯如畫兩三人
倚闌棋聲敲竹外簾影
落花間一曲瑤琴罷翠
陰生晝寒

妙因寺次施敬所韵

松蘿一徑陰踏破白雲深約客分茶供逢僧倚竹吟鼠留香篆迹
禽和閣鈴音話久不知晚新螢照出林

晚春

有恨青春老無營白晝長葉新林換綠花落地生香雨意一番足
人家百事忙爲儒竟成誤悔不早農桑

冬雪

雪凍飛禽少林深落葉多寒塘倒山影空谷答樵歌不有梅花在
其如詩思何霜風吹落帽應歎鬢絲皤

新涼

煙火林幽處田園秋暮時深村人到少閨月稻黃遲旋決渠分水
新編竹補籬地爐煨芋栗莫遣貴人知

江樓秋夕

樓高古城繞無奈漏聲催幽夢風吹斷新吟月送來江長漁唱遠
雲冷雁聲哀明日重陽酒黃花開未開

初夏訪劉道士

白雲隨杖履伴我到山房暑薄疑天別林深見路長
花竹亦詩香更待荷花後來分半榻涼

春行

東風物物新花外步清晨蕉葉卷舒雨鳩聲問答春園林
三月景詩酒百年身試數交遊侶如今有幾人

孤標上人留宿

山僧留我宿我亦似山僧香茗半甌雪寒葢一筋冰廊風響黃葉
壁兩暗青燈參透詩三昧何須契一乘

秋晚

暮色入江郊，霜風兩鬢毛。
笛聲吹月落，詩興挾秋高。
謝絕南柯蟻，留連左手螯。
孤燈竹窗底，危坐一歌騷。

李脩伯山居

俗子自不到幽扉，何必扁苔衣。
和月臥山雨，雜泉聽有髮徒斑。
白無名入汗青，未應間此事。
尙可掃邊經，寒燈幾撥盡。
借問夜何其，舊夢青編在。
新愁白髮知，昔爲三遶雀。
今作五藏龜，多謝梅梢月。
留人得睡遲。

道逢過軍投宿山寺

窮途欲焉往，薄暮此相投。
蟋蟀數聲雨，芭蕉一寺秋。
鄉關來枕畔，時事上眉頭。
長嘆爲僧好，今逢更說愁。

七言律詩

述懷

不敢尤人敢怨天，愁來覓酒醉來眠。
五窮有鬼偏相虐，九轉無丹別自全。
遊食懼違新下令，力耕苦乏舊存田。
靈臺坐受憂兵觸，荏苒霜華剝鬢京邊。

春曉雨

破曉簷花未放乾，披衣和夢倚闌干。
釀成苔暈地猶濕，老盡鶯聲風正寒。
無客醉敲金鞮響，有人睡怯翠衾單。
牡丹一夜成消瘦，下却朱簾不忍看。

一作珠

簾不忍看

西湖圖

兩袖春風一丈池，池字誤一作藜等閒踏破柳橋西。
雲開遠嶂碧千疊，雨過落花紅半溪。
青旂有情邀我醉，黃鶯無恨爲誰啼。
東城正在桃林外，多少遊人逐馬蹄。

隱懷

樣不趨時合便休都將往事付東流眼看浮世自今古迹與孤雲
同去留泉石定非騎馬路功名不上釣魚舟有時但得句無問只
與漁歌互唱酬

遊鳳棲寺

十載從遊古鳳棲蓮宮新遶綠楊堤欲談世事佛無語不管客愁
禽自啼苔滑空廊妨散步塵昏老壁失留題僧家田一作山地隣家

種菜甲春風一作生綠滿畦

漁浦晚秋旅懷一無旅懷二字

西風吹夢越中遊剪剪輕寒入短裘雁字不將鄉信寫蛩聲空和
旅吟愁郵亭冷雨孤燈夜漁市斜陽一笛秋是處山川即吾土仲
宣何用怯登樓

泊舟嚴灘

天色微茫入暝鐘嚴陵湍上繫孤篷
水禽與我共明月蘆葉同誰吟
晚風隔浦人家漁火外滿江愁思
笛聲中雲開休望飛鴻影身
卽天涯一斷鴻

題永嘉夢草堂

留得斯堂萬古名江山不敢閉英靈
池光曾染吟邊墨草色猶如夢裡
青南浦詩香流未歇東家魂冷喚
難醒當時園柳俱塵迹惟有鳴禽
尙可聽

連城春夜畱別張建溪

飛絮遊絲客子心連城那忍遽分襟
青燈應見詩情苦濁酒不如交味
深一榻暖風棲竹屋半闌淡月立
花陰離懷今夜先收拾盡付明朝
馬上吟

夜坐

匹馬平生汗漫遊如今寂寞老林丘小窗半夜青燈雨幽樹一庭
黃葉秋懶看世情寧睡去怕傷時事莫吟休寒蛩可是知人意未
到莎根只說愁

春行

短帽輕衫步履遲微暄天氣乍晴時池融嫩碧銷殘凍春剪新紅
綴舊枝嵐翠滴衣堪入畫禽聲到耳足供詩東風苦欲招人醉頻
掉橋西賣酒旗

初冬

林葉新經數夜霜地爐獨擁一山房塵書邀我共高閣濁酒勸人
歸醉鄉費省家貧還似富身閑日短亦如長梅花苦欲催吟興又
破梢頭半點香

東粵廟

頽闌斜照網蛛絲陳迹淒涼萬古悲
柘水尙鳴亡國怨山松曾見
受封時碑因苔蝕無完字城爲田
侵失舊基當日東甌知幾戰如
今贏得一荒祠

歲暮

顏不常朱鬢

一作鬢

易斑流光難駐兩跳丸一年又是等閑過百歲

只消如此看把酒何曾長在手種桃能得幾凭闌
癡人醉夢不知醒日夜雙眉抵死攢

間居漫賦

紛紛裘馬走紅塵賴得閒邊可著身
商嶺定無屠狗客雲臺豈有釣魚人
溪山蕭散青鞵履風月夷猶烏角巾
萬事如棋君看取一番局面一番新

三峯寺

寂寞煙林噪晚雅青鞋步入野僧家雲深不碍鐘聲出日轉還移
塔影斜廊下蝸粘沿砌蘚佛前蜂戀插瓶花竹床紙帳清如水一
枕松風聽煮茶

江頭春日

風煖旗亭煮酒香醉醒始悟是他鄉駕言行邁路千里豈不懷歸
天一方春事漸消鶯語老離愁偏勝柳絲長無聊莫向城南宿淡
月梨花正斷腸

次韵潘恕堂見寄

抱瓮區區老漢陰空齋擁鼻日長吟青山隔截市朝面白髮消磨
豪傑心書既無成休學劍貴無可買恥言金情知不入鸚鵡侶賴
有鷗盟尙可尋

初夏

一葉

一作夜
良是

薰風帶暑回雨添濃翠與庭槐不隨春去鶯猶在好

競時妝榴又開剪刀旋裁新白苧杯盤聊薦舊青梅篋中敝扇投
間久依舊團團入手來

間吟初冬

一架琴書一筆牀杜門荏苒送年光囊空儘可償詩債脚倦猶能

入醉鄉既有一

一作老
良是

菊花偏耐久未開梅蕊已先香眼邊管領閒

風景不識人間更有忙

春和頗動游興呈雲耕叔祖

節遇中和景漸暄自摩倦眼望前村雕鏤花柳春無迹沐浴山川
雨有恩憶昔踏青終日醉如今垂白幾人存未應便作衰翁看藉
草猶堪倒一尊

夜飲趙園次徐君實韻

銀臺絳蠟淚成堆四面軒窗盡放開花影忽生知月到竹梢微響
覺風來豪揮彩筆詩千首醉倚紅粧酒百盃游玩未闌歸未得高
城漏箭幾相催

平章命

似有脫文

萬甲蟠胸老氣雄將星光照海雲東聲名宣慰裴中立地步平章
韓魏公大纛高牙山水縣褒衣博帶藻芹宮書生端爲斯文喜俎
豆先行軍旅中

幽棲

鶴護松扉久不開蒲團端坐思悠哉故交只向夢中見閒事不經
心上來雙屐躡雲春采藥一筇挂月夜觀梅東風似見山童懶自
與幽人掃徑苔

讀劉元城言行錄

一掃權姦九十章七州不憚歷炎荒黃梁富貴百年短青史是非
千載長丞相雖存心已死先生既葬骨猶香向令鐵漢常留在天
下何緣有一作得靖康

次李林居春曉遊園

滅沒晨曦弄澹晴追隨杖履竹閒亭花逢酒侶容先醉柳見詩人
眼剩青三月光陰半流水百年身世一浮萍啼鶻只管催春去不
道衰翁已怕聽

聖果院訪忠上人不值

管領東風入杖藜落梅香裡已招提苔痕一徑白雲濕花影半牕
紅日低欲見高僧聊爾耳便乘餘興去來兮葛藤有話無人共付
與隔林幽鳥啼

山行

林梢初日弄陰晴，露溼溪花笑欲迎。
澗暗只聞泉滴瀝，山青剩見鷺分明。
遠峯忽轉還如遠，險徑徐行亦似平。
莫謂詩成無與和，風篁也解作吟聲。

秋夜次葉一山韻

自笑秋來似轉蓬，偶然飛落過山中。
一燈幽館菊花雨，孤枕小樓梧葉風。
涉世悠悠旋磨蝨，懷人杳杳寄書鴻。
浮生何預光陰事，抵死相催作老翁。

杜鵑花得紅字

愁鎖巴雲往事空，只將遺恨寄芳叢。
歸心千古終難白，啼血萬山都是紅。
枝帶翠烟深夜月，魂飛錦水舊東風。
至今染出懷鄉恨，長挂行人望眼中。

客中臨歸仍送游教諭

建括相望天一涯快哉此地話襟期
芹邊春暖幾杯酒門外月高
千首詩去去先生此升當是休矣
栖栖遊子暮何之送行折了郵亭
柳歸臥白雲歌紫芝

自問

年來心跡兩悠悠若比孤雲儘自由
既不貪榮安有辱縱饒無樂
亦何憂一絲風月嚴陵釣千里關山
季子裘到底行藏定誰是試
將心事問沙鷗

永嘉秋夕

風戰枯桐敲紙窗擁裘無寐夜偏長
譙樓三鼓夜將午雲雁數聲
天正霜寓世此身驚逆旅寬懷何處
不吾鄉江頭風景日堪醉酒
美蟹肥橙橘香

醉題齋壁

此是閑中安樂窩從渠忙處爲奔波人心少似秋胡婦世事多參
春夢婆但把功名齊蟻蛭定無榮辱到漁簑醉鄉境界偏寬闊天
地都歸一浩歌

客中遇鄉友季芳遠歸省親

河梁解后話襟期獵獵西風透袂衣酒臉未隨紅葉醉鄉心先逐
白雲飛客中送客難爲別山上安山胡不歸借一作便使家書君可
寄此間無復問庭幃

山人家

片雲隔斷嶂西風三兩山花屋角紅幾畝桑麻春社後數家雞犬
夕陽中拾薪澗底青裙婦倚杖簷間白髮翁我亦願來同隱者種
桃早晚赴東風

劉伯山寄隱

寄隱幽蹤何處尋
春風十里薜蘿深
青山不說是非事
黃鳥自賡長短吟
百折畏途休著脚
十分明月是知心
不應誤放桃花出
惹得漁翁話古今

朱溪

路轉峯回又一村
天寒大半掩柴門
雲融山脊嵐生翠
水嚼沙洲樹出根
任擁重裘風亦冷
未投荒店月先昏
今宵只傍梅花宿
贏得清氛一作芬入夢魂

丹山書堂

作室懸知要肯堂
而翁家學頗增光
一朝衿佩傳簪合
千古詩書屋壁香
鑑曲烟霞歸羽館
鍾山風月落僧房
如何只揭精廬扁
解續斯文氣燄長

閒中

敢咎章縫解誤人甘於閒處著閒身腹中書在溫仍熟夢裏詩成
記不真引鶴徐行三徑曉約梅同醉一壺春今朝有喜誰知得新
換頭銜號散民

送雲泉入山

薜蘿叢裏鬱青青別是幽棲一段清水色山光皆畫本蟬聲禽語
亦吟情人今不改衣冠古道重方知富貴輕爲語俗交休見問已
從麋鹿訂新盟

冬暮小齋

布襪青鞋敝絮袍松扉柴儿小
衝茅雲酣纔釀臘三月梅吐又橫
春一梢炭爲驟寒偏索價酒因不飲懶論交窮年兀兀從人笑未
用多方作解嘲

宿南峯寺

禪房花木鎖深幽借與詩人信宿留幡影分來半廊月磬聲敲破
一林秋僧偏好事能青眼佛本無心亦白頭試問青松峯外鶴閒
邊曾見幾人遊

歲朝

畫角聲中舊歲除新年喜氣滿屠酥陽和忽轉冰霜後元氣更如
天地初晚色催詩歸草夢春光隨筆上桃符閉門賀客相過少靜
對梅花自看書

春曉山行

風掃連陰作一作快晴瘦筇伴我出山肩路從初日紅邊過人在
野花香裏行古木殊無趨世態幽禽懶作弄春聲屐鞋踏遍山南
北只與白雲相送迎

王廉使

鼻祖名高三諫官耳孫玉立又臺端氣增浙左霜威動面帶終南山色寒攬轡肯教狼臥地歸班便合豸峨冠公餘詩興清於雪細嚼梅花入肺肝

幽興

不賦千鍾賦一簞天公有意養癡頑書猶能看未曾老詩亦莫吟方是閒寬著庭除貪貯月少栽竹樹要觀山空階兩日無行迹又上苔花幾點斑

五言絕句

梅仙山 梅福鍊丹地

西都不知壽安用獨長年縱有丹爐在難吹漢火燃

螢火

微蹤一腐草霜重不禁秋想悟浮生短常爲秉燭遊

蜜蜂

釀成百花脾聊爾了口腹人知口中甘誰料腹中毒

觀書自歎

皓首抱遺經堪憐誤一生空共蠹蟲當作魚飽自作忍饑聲

吉水夜泊

入夜始維舟黃蘆古渡頭眠鷗知讓客飛過蓼花洲

草

艸枯根不死春到又敷榮獨有愁根在非春亦自生

百舌

花閒報曉晴巧弄百般聲未可嫌饒舌猶勝雁不鳴

秋扇

人心有炎涼我心無歡悲篋中重自珍會有薰風時

訪李延不值

白雲滿空山山空人未歸拄杖莫敲門恐驚白雲飛

七夕

世上癡兒女爭趨乞巧筵婦鳩甘抱拙不諂鵲橋仙

七言絕句

楊妃

三郎掩面馬嵬坡生死恩深可奈何瘞土驛傍何足恨潼關戰處骨埋多

水墨海棠

不將翠袖捲紗紅怪得陳京奪化工想是太真春睡足夢魂正在黑甜中

三月晦日與邵石諸友閑遊東園分得空字

韶光收拾太匆匆
眼底浮花一掃空
畱得數枝紅
藥在五更分付
與東風

年少遊春

一作游春
少年

錦袍朱帶玉花驄
著意追歡紫陌東
只道春風屬楊柳
不知楊柳
有秋風

山間早春

小桃枝上認年華
隨分紅開一兩花
將謂春風只城市
也吹春色
到山家

三月晦日

九十風光能有幾
東風遽作遠行人
尊前莫惜今朝醉
明日鶯聲
不是春

高帝

未央前殿養親時
想記當年俎上危
借問杯羹何等語
如今安用玉爲卮

晚步

未暝先啼草際蛩
石橋暗度晚花風
歸雅不帶殘陽去
留得林梢一抹紅

春閨詞

愁鎖眉尖未肯消
何心更待兩娥嬌
一春螺黛渾無用
付與東風染柳條

山間秋夜

夜色秋光共一闌
飽收風露入脾肝
虛簷立盡梧桐影
絡緯數聲山月寒

新年

妝點春光到眼邊
凍消殘雪煖生煙
杏桃催換新顏色
惟有寒梅老一年

九日

懶把黃花插滿頭
正緣老大見花羞
年來頗恨儒冠誤
好倩西風吹去休

醉餘再賦

堪歎詩翁酒興豪
醉餘猶復一登高
西風抵死相搖撼
爭奈儒冠裹得牢

真山民詩集 完

真山民詩集補遺

陳雲岫愛騎驢

君不學少陵騎驢京華春一生旅食長悲辛又不學浪仙騎驢長
安市淒涼落葉秋風裡却學雪中騎驢孟浩然冷濕銀鞵敲吟鞭
梅花溪上日來徃身迹懶散人中仙有時清霜松下路松風蕭蕭
驢耳豎據鞍傲兀四無人牧子騎牛相爾汝勸君但騎驢行路穩
姑徐徐九折畏塗鞭快馬年來曾覆幾人車

右見元詩體要

金 山 桃 氏
捐 贈 圖 書

上海图书馆藏书



A541 212 0007 1604B

刊
行

Handwritten note: 1002/500

光緒三十二年十月印刷
光緒三十二年十月發行

(國粹叢書真山民集)

定價洋壹角

印行者

上海鐵馬路北愛而近路
國學保存會

發行所

上海四馬路東惠福里
國粹學報館

2